

k29
H819
1368 (1)

中國方志叢書·華中地方·第三六八號

據民國二十一年陳銘勳修影印


四川省

渠

縣

志

(一)



成文出版社有限公司印行



10106093

sk53/10

中華民國六十五年 月臺一版

渠縣志

全四冊

發行人：黃成助

出版者：成文出版社有限公司
台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第
一一四七號

叙

渠縣志十二編永川鍾正懋初爲商略訂次篇目例議會采訪急就程功蘊緝其渠縣形勢街市交通山脈水系各圖屬之富順羅愷素欽地理志第一屬之熊衡姜筱尙食貨志第二田賦榷政戶口水利蠲政屬之王南堂萃五鹽法茶法錢法屬之楊思慎秀思教育志第三實業志第四官師表第八屬之熊廷傑特傳禮俗志第五禮制屬之張韻桐伯琴風俗屬之段文炎綬珊藝文志第六屬之章含仲禹兵備志第七屬之萬之綱華笙人物表第九列傳第十屬之郭奎銓雲騫別錄第十一瑩墓金石屬之張士傑智遠古蹟祥異雜識屬之鄧鳴鸞唯一文徵第十二屬之袁希安超凡冉之簡伯敬胡春滋畹蘭爲協纂奉節胡紹斌慧根分任編輯毛樂豐以衢以常務采訪參左創草凡六月長編略就

正懋有隆昌之役梁山許仁經宣相助爲理期年受代初校始業卒又五月篇秩定都爲七圖六十四卷蓋正懋治其凡要以舉成法經宣治其目數而爲司旅智愚相待文質相胥陳力之勤慮已過半是當與渠中父老昆弟共識之爾同里黃振河星伯遂書雖比旣訖渠縣知事蒲江胥君爲著錄焉

附渠志商略

郡縣方志高者比方國別史與左氏外傳同科次或昉於周官誦訓以知地俗以觀新物常道將華陽國志次錄公孫劉李自治一方方嶽之威共主之制高世比德於齊晉吳楚誠有足以上儕國語者其七略錄周考周紀周說隋志著南州異物志南方草木志荆楚歲時記洛陽伽藍記陳留耆舊傳汝南先賢傳事皆叢碎惟

據偏國即較然與春秋異流是故漢方士虞初武帝時以侍郎爲黃車使者奉采周俗稱周記而不稱河南說宋世范成大次平江府志不從今名而稱吳郡志誠以方志圖經不與邦典而疆易之事彼此無常自商周建國迄於秦漢分郡縣以逮近世數千年閒士女之籍期無旁溢惟有斟酌古今弗牽時制題名一從古郡縣所部不必專繫於今此無論當官奮筆與私家撰述其爲深識流別則一矣若夫周禮小行人之守自萬民之利害而下物爲一書每國辨異之以五物反命於王以周知天下之故管子山權數春秋者所以記成敗也行者道民之利害也以其掌之行人故謂之行猶太史公書禮雜記亦引贊大行是皆小說實則方志根極大共乙部著錄茲族其容至博自諸雜傳圖經地理之記乃至青史

小說儀注短書靡不兼包並函同傳一科以別於春秋國語封域既明斯志乘可得而作本餘杭章先生說官書私著蓋無擇焉

唐劉知幾子玄撰史通其內篇雜述權論史氏流別有十其小錄之戴達竹林名士王粲漢末英雄蕭世誠懷舊志盧子行知己傳瑣言之劉義慶世說裴榮期語林孔思飼語錄陽玠松談數郡書之圈稱陳留耆舊周斐汝南先賢陳壽益都耆舊虞預會稽典錄別傳之劉向列女梁鴻逸民趙采忠臣徐廣李子地里書之盛宏荊州記常璩華陽國志辛氏三秦羅含湘中乃至逸書之顧協梁語謝綽拾遺家史之孫氏訖記陸宗系歷與夫雜記之劉義慶幽明劉敬叔異苑都邑簿之三輔黃圖洛陽關中莫非後世方志規摹所及然子玄固云其間得失紛糅善惡相兼難爲覩縷且同自

鄙彼其權衡取舍容與文史通義相絕所宜比物合虛校其封域
明其分齊以爲去甚泰者矣又以古之史臣如董狐南史丘明子
長皆出自一家咸能立言不朽未聞藉以衆功自後漢東觀大集
羣儒高齊周隋有監修自領之制於是著述無主閣筆相視汗青
無日頭白可期兼視聽不該直書見錮注記取稟監修十羊九牧
揮鉛奮墨勞逸不均當時制爲五不可之論自守司東都驛召至
京遂與監修國史蕭至忠諸官書求退輓近方州志乘之興著於
明代不可之論慮亦視此有加傷今所以思古陳古亦以諫今爾
清章學誠實齋承浙東萬氏繙業爲文史校讎諸通義以復歆固
之學囊括大典卓約或過史通中歲數膺志乘之聘涉厯事志爲
多撰次湖北通志和州志亳州志永清縣志天門縣志方志立三

書議州縣請立志科議修志十議地志統部武功朝邑吳郡姑蘇
灤靈壽諸志書後與諸人書論修志事並和州以下各志序例本
末經緯條宣究極體理縝密隱括爲無遺矣以謂州郡均隸職方
固不得加封建之國別爲史然義例不可不明志爲全書總名皇
恩慶興錄爲外紀官師銓除畫爲年誕典籍法制爲攷以著之入
物名宦爲傳以列之載文倣三通七略之意比類成編不與選文
相混舊志卷帙目錄作者姓氏並予錄入聽其並行又以今之方
志多分題目浩無統攝如星野疆域沿革山川物產俱地理志中
事也戶口賦役征榷市糴俱食貨攷中事也災祥歌謠變異水旱
俱五行志中事也朝賀壇廟祀典鄉飲賓興俱禮儀志中事也凡
百大小均可類推篇首冠以總名下乃條分件悉彙列成編非惟

總萃易觀亦且謹嚴得體自餘如成文宜標作者傳體宜歸畫一
論斷宜守謹嚴典章宜歸詳悉自注宜加酌量文選宜相輔佐列
女宜分傳例並所謂乘二便盡三長去五難除八忌立四體歸四
要議職掌議攷證議徵信議徵文議傳列議書法議援引議裁制
議標題議外編馬班而後家學漸衰而特立名家之學起六代以
還名家復歇而集衆修書之法行志體壞於標題不得史法標題
壞於執文不合史例故於執文一部尤三致意焉卮言贅義互見
參證之處彌復不一而足居今日而欲經紀一方文獻宏綱遠條
深根甯極咨惟先生其百世不祧之宗乎

范成大吳郡志五十卷曰沿革曰分封曰戶口租稅曰土貢曰風
俗曰學校曰城郭曰營寨曰官宇曰倉庫場務附焉曰坊市曰古

蹟曰封爵曰牧守曰題名曰官吏曰祠廟曰園亭曰山曰虎邱曰橋梁曰川曰水利曰人物列女附焉曰進士題名曰土物曰宮觀曰府郭寺曰郊外寺曰縣記曰塚墓曰仙事曰浮屠曰方技曰奇事曰異聞曰攷證曰雜味曰雜志凡三十九篇王鏊姑蘇志六十一卷首郡邑沿革次古今守令次科第皆爲之表次沿革次分野次疆域次山次水次水利次風俗次戶口次土產次田賦次城池次坊巷次鄉都次橋梁次官署次學校次兵防次倉場次驛遞次壇廟次寺觀次第宅次園池次古蹟次冢墓次吳世家附封爵氏族次平亂次宦績次人物人物之中分名臣忠義孝友儒林文學卓行隱逸薦舉藝術雜技遊寓列女釋老凡一十三類殿以紀異雜事而卷次多寡不以篇目爲齊名宦分卷爲六人物中之名臣分

卷爲十忠義與孝友合爲一卷儒林與文學合爲一卷倉場與驛遞合爲一卷如此等類不一而足總六十卷蓋約略紙幅多寡爲之陳士元灤州志分四篇一曰世編二曰疆里三曰壤則四曰建置世編分目爲三一曰前代二曰我朝三曰中興疆里分目爲六曰域界曰理制曰山水曰勝概曰風俗曰往蹟壤則分目爲七曰戶口曰田賦曰鹽法曰物產曰馬政曰兵政曰驛傳建置分目爲十一曰城池曰署廨曰儒學曰倉庫曰舖舍曰街市曰坊牌曰樓閣曰橋渡曰秩祀曰寺觀而官師人物科目選舉俱在編年之內康海武功志三卷又分七篇各爲之目一曰地理二曰建置三曰祠祀四曰田賦五曰官師六曰人物七曰選舉篇首冠以二圖一爲輿圖一爲蘇氏璇璣圖韓邦靖朝邑志二卷爲書七篇一曰總

志二曰風俗三曰物產四曰田賦五曰名宦六曰人物七曰雜記
陸隴其靈壽縣志十卷一曰地理紀事方音附焉二曰建置三曰
祀典四曰災祥五曰物產六曰田賦七曰官師八曰人物人物之
中又分后妃名臣仕績孝義隱逸列女九曰選舉十曰藝文田賦
藝文分上下卷祀典災祥物產均合於一上來六志固近代膚敏
聞人之作載祀留青時見稱引實齋各爲書後然譏訶掊擊爲已
至矣石湖之書指爲宋人詩話家風大變史文格律濟之之書譏
其暗於史裁浸漬於文人習氣深慨乎文人不足與於修志養吾
之書斥其矯誣迂怪頗染明中葉人不讀書而好奇習氣至康韓
陸三家之書一則曰蕪穢乖刺識既不足又不知史家法度文章
體裁胸中全無倫類惟欲約省卷篇一則曰直是一篇無韵之朝

邑賦又是一篇強分門類之朝邑考宜置之六朝人小記短書中正其三謬傷其不自度量不解史學輒欲求異於人故爲書不情至此作者所不屑道一則曰迂誕無理偏見強辭學究壓人故習不甚解於文理誠以問學之涂前修未密輓出轉精昔人成器所至從而推校枉章往往後易爲功正如子玄史通彈射晉後諸史視法吏慮効重囚猶且過之此亦無間今昔者矣

渠縣舊志終胡清世有四本一雍正本知縣房山徐兆麟著錄貢生李穎述橐一乾隆本知縣蕭鉉著錄貢生李祖莊以此述橐知縣李雲驥鋟板一嘉慶本署知縣黃陂王來遴著錄貢生譚承恩以次述橐一同治本署知縣桂林何慶恩著錄貢生賈振麟以次述橐雍乾二本今佚不可見嘉本錄蕭叙稱雍本明白顯易略而

未詳同治本經籍志亦道其筆墨潔淨又嘉本凡例內載舊志修於乾隆五年編目三十八約以十六條分類附從雖較詳明未符史裁此即乾隆本又云今遵省局給發章程格式列卷五十二依式備載其爲本縣所無者仍以次臚列卷目書無字於下又同治本凡例亦云本志遵奉頒發體例通觀四志雍乾二本義取簡賅嘉同一本依準功令同本標題類敘又昉嘉本現行同本卷五十一簽署雜識與嘉本同而文字蓋闕不可見疑鋟板寢以放失或紙素有所奪遺其卷七卷二十一卷二十二卷二十三卷二十四卷二十五卷二十六卷二十七卷二十八卷二十九卷三拾一卷四拾三卷四拾五著錄水利屯田邊防驛傳鋪遞土司屯練錢法木政權政方技營繩諸篇一依原例初爲本縣所無各書無字於下兩本亦初無

二致有同本遂錄嘉本文字唯於序例中略施點竄或並序例亦悉予遂錄者如卷五卷十九卷二十卷二十七卷二十八卷三十二卷三十九卷四十著錄形勢風俗兵制鹽法茶法蠲政列女隱逸諸篇是也有同本遂錄嘉本文字仍依時代隨分增益以資銜接者如卷八卷九卷十卷三十三卷三十四卷三十五卷三十六卷三十七著錄戶口田賦城池職官選舉封蔭政績武功諸篇是也有同本排比較勤攷索較精取舍較嚴附錄較備或假表謬以施隸括往往爲嘉本所弗逮者如卷一二卷三卷四卷六卷十一卷十二卷十三卷十四卷十五卷十六卷十七卷拾八卷三十八卷四十一卷四十二卷四拾四及嘉本原次卷四拾六卷四拾九卷五拾同本原次卷四拾八卷四拾九卷五拾二著錄圖攷沿革疆

域山川關隘津梁古蹟公署學校祀典祠廟寺觀人物流寓仙釋
陵墓藝文產祥異諸篇是也有兩本署目指事初無出入而前
書不爲審諦義有未安賴後書爲之補苴是正者如卷一著錄星
野一篇是也至於經籍之部冊自隋書所以差次丙丁浚抒流別
因劉氏七略孟堅藝文志之遺也兩本皆以藝文爲總集鈔選之
業其失則均然同本卷四拾六著錄經籍雖復闊略眇小庶幾石
渠天祿事守弗替而嘉本卷四拾七題署典籍直與前錄水利屯
田邊防驛傳諸篇同科卷四拾八金石亦然其卷五拾一著錄雜
識一篇同本復取以實金石之部爲卷四拾七嘉本卷五拾二外
紀志山水異蹟同本卷五拾一外紀志士女騎行要其盈蝕異同
之故固當世得失之林亦以辨表後昆爲足定其從違取舍者矣

昔吾有先正其言明且清史官之守方志之業實齋爲條理始終矣慮有甚泰則子玄自鄆之喻章先生流別之辨參而伍之庶幾謹審權量分理明察老聃有言天下皆知美之爲美斯惡矣推本先正斷之後賢迄於石湖濟之以次陳康韓陸諸家舊籍譚賈故書排比會通觀其所聚因其厯數盡六十年詳略文質興替蕃變之迹定次新志篇目例義就正有道君子

地理志第一

舊志星野圖攷建置沿革疆域形勢
山川城池關隘津梁驛傳鋪遞屬之

秀山李稷勳堯臣次秀

統部方州可以援證古籍推求大舍若州縣圖經百里之土其當於度分幾何徒煩其傳會焉故今惟據北極高度及今師中綫偏度以爲攷地證圖之資其說精鑿可法今由富順